

FRANTZIAKO LEGEBILTZARRERAKO HAUTESKUNDEAK. Euskal Herri osoan gogoetatuko dira

Gogoetaldi bat abiatuko du Batasunak hartu beharreko jarrera erabakitzeke

ABren erabakia errespetatzen dutela baina ez dutela ulertzen adierazi du Larralde

Eneko Bidegain | BAIONA

Batasunak gogoetaldi bat abiatuko du Euskal Herri osoan, Frantziako Legebiltzarrerako hauteskundeetan hartu beharreko jarrera erabakitzeke. Hori jakinarazi zuen Xabi Larralde Mahai Nazionalako kideak atzo. Hainbat bilkura antolatuko dituzte eskualdez eskualde. «Gonbita ez zaie soilik Batasunako kideei egin, baizik eta abertzale orori», zehaztu zuen Larralde. Gogoeta prozesu horren ondotik ezagutaraziko du Batasunak bere jarrera. Oraingoz «aurreiritzirik» ez daukatela ziurtatu zuen Larralde. Baina hauteskunde horietan «abertzaleen mezua present egotea oso inportanta» dela abisatu zuen.

Arnaldo Otegi «funtsezko-tzat» jo zuen «Frantziako hauteskundearen inguruan gogeta orokorra» egitea. Hauteskunde bakoitzak «bere ezaugarriak» dituela azpimarratu zuen. «Bai Espainiako eta bai Frantziako hauteskundearen inguruan fun-



GAIZKA IROZ
Batasuneko ordezkari Aintzina Mazusta, Arnaldo Otegi eta Zigor Gojeaskoetxea, atzo Baionan eskainitako prentsurrekoan.

tsezkoa da herri gisa jokatzeko, eta ez alderdi politiko gisa», adierazi zuen Otegi. «Horrela hauteskunde batean, abertzaleen arteko lehiak ez dauka zentzurik». Batasuneko bozemaileak gehitu zuen «jokoan» dagoena ez dela bakoitzaren proiektua, baizik eta «herriaren aitortza».

Xabi Larralde zehaztu zuen ABren erabakia «errespetatzen» dutela baina ez «ulertzen». Urriaren 6ko biltzar nagusian «Euskal Herrian ezker abertzaleko koordinazio baten sortzea» erabaki zela oroitarazi zuen. «Hor, preseski, hauteskunde horien inguruan ikusten delarik bide horretan lehen

urratsa egiteko aukera, ABk ezezkoa erabaki du», azpimarratu zuen Larralde. «Printzipioz beren burua ezker abertzalean kokatzen duten alderdiek kokapen ideologiko bera dute. Gauza berak erranen dituzte hemengo gizartearen aitzinean». Horrek «nahasmena» sortuko duela zehaztu zuen Larralde.

Urriaren 6ko ABren biltzar nagusian Batasunekoek elkar-gune bat «ezinbestekoa» dela adierazi zutela oroitarazi zuen Larralde. Biltzar hartan «AB plataforma izatetik alderdi izatera» pasatu zela gehitu zuen. «AB ez da gehiago elkargune bat», nabarmendu zuen. Baina Batasunak elkargunearen behar-raren «ikuspegiarekin» jarraitzen du. «Heldu diren legebiltzarrerako hauteskundeetan aukera bat ikusten genuen platformaren bidean lehen urratsa egiteko». Horren ideia ez dela «baztertua» ziurtatu zuen. «Ea gauzatzen ahalko den, hori besterik da...», komentatu zuen, ondotik.

BATASUNA. Batasuneko batzarrak eskatu zuen

Belauntzako alkatearen dimisio eskaera berretsi du Gipuzkoako Mahaiak

Axun Erribengoa | DONOSTIA

Gipuzkoako Batasuneko Mahaiak berretsi egin du Imanol Olano Lopetegik Belauntzako alkatearen eta Iban Olano Arbelegi alkateordearen dimisio eskaera. Hilaren 10ean Belauntzako Batasunak batzarra egin zuen, eta batzar horretan erabaki zuten gehiengoz alkatearen eta alkateordearen —biak alderdi horretakoak— dimisioa eskatzea. Bi pertsona horiek, hain zuzen, batzarrean izan ziren.

Joxe Mari Jauregi, Ana Jesus Argote eta Oskar Piriz Belauntzako Batasuneko ordezkariak atzo prentsurrekoan adierazi zuten, alkatearen eta alkateordearen lanaren inguruko kritikak aztertu zituzten batzarrean. «Ezadostasun nabarmenak azaldu ziren, batik bat alkateak eta alkateordeak

landu duten ildoaren eta aurreantzean Batasunak landu nahi duenaren artean».

Desadostasun handienak «Udalaren kudeaketan» hartutako zenbait erabakiren ingurukoak izan direla diote. «Lehen-go legealditik oraingora zintzilik zeuden gaiei emaniko erantzunarekin ez zetorren bat batzarra», Pirizek adierazi zuenez.

Ainhua Ozaeta Batasuneko Mahai Nazionalako kide eta Gipuzkoako arduradunak adierazi zuen Batasuneko herrietako batzarrek horrelako erabakiak hartzeko ahalmena dutela, eta Gipuzkoako Batasuneko Herrialdeko Mahaiak erabaki horrekin bat egiten duela. Dimisio eskaera ostegunean egin arren, oraingoz alkateak eta alkateordeak ez dute kargurik utzi. Alkateak herri batzarra antolatu du gaurko.

EA. Buscaren dimisioa atzo gauzatu zen plenoan

Julian Arinek hartuko du Buscak Zumarragako Udalean utzitako zinegotzi kargua

Agentziak | ZUMARRAGA

Zumarragako Udalean Uxue Busca EAko zinegotziaren ordezkaria Julian Arin izango da, zerrendan hurrengoa zena. Atzo egin zen osoko bilkura Zumarragan, eta bertan gauzatu zen Buscaren dimisioa.

Zinegotzia bera ez zen egon osoko bilkuran, baina haren gutun bat irakurri zuten. Jakina denez, Buscak adierazi zuen kargua utziko zuela «erradikalen irain eta mehatxuengatik». Hain zuzen, ETak hildako Manuel Indiano PPko zinegotziaren alargunari laguntzen hasi zenetik mehatxuak jaso dituela adierazi zuen. Atzoko gutunean ere «mehatxuak eta irainak» aipatu zituen arrazoi gisa.

Aitor Gabilondo alkateak EA-EAJko zinegotzien idatzi bat irakurri zuen. Batasunari galdegin zion «mehatxua, es-

tortsioa eta indarkeria politikarako tresna gisa erabiltzea pertsona guztien giza eskubideetako errespetuzkoa» den.

Gabilondok eskatu zion Batasunari hautatzeko «ETaren estrategia politiko-militarra» barruan jarraitzea, edo bide politiko eta demokratikoetik soilik jarraitzea. Dimisioa ez dela garaipena izan adierazi zuen Gabilondok, eta erantsi Buscak utzitako hutsunea berehala beteko duela EAK. EA-EAJk eta EB-IUko kideak ere elkartasuna agertu zieten Buscari eta haren sendiari.

Zumarragako Udaleko 17 zinegotzietatik bederatzi bakarrik geratzen dira orain. Bat ETak hil zuen, PSE-EEko bostek dimisioa eman zuten bizkartzainik eraman nahi ez zutelako, eta Batasuneko batek talderarekin desadostasunak zituelako utzi zuen kargua.

EUSKAL PRESOK

Jipoiagatik epaitu funtzionarioak absolbitzeko eta presoak zigortzeko eskatu du fiskalak

Erredakzioa | DONOSTIA

Iazko apirilean Harriet Iragi presoak jipoiu zuten bost funtzionario epaitu zituzten atzo Madrilgo Valdemoroko 2. Instrukzio Epaitegian. Iragi, ordea, biktima izatetik akusatu izatera pasatu zen, Askatasunak jakinarazi zuenez, eta fiskalak funtzionarioak absolbitzea eta presoak zigortzea eskatu zuen.

Iragi apirilaren 19an jipoiu zuten, Valdemoroko kartzelan. Jipoiaren ondorioz lepoko mina izan zuen, eta zauriak ezkerreko besoan eta ukondoan. Auzitegiko medikuak eginitako txostenetan zauri horien berri eman zuen.

Gertaera horien ondorioz, Iragik salaketa jarri zuen bost funtzionarioen aurka, eta horregatik zen atzoko epaiketa. Epaigela-iristean, ordea, hiru funtzionarioen abokatuak zigorra eskatu zuen Iragirentzat. Fiskalak bat egin zuen eskaera horrekin, eta lesio falta bat eta ordena publikoaren aurkako beste falta bat leporatu zion. Isuna jartzeko eta hiru asteburuz arrestatzeko eskatu zuen, eta funtzionarioak absolbitzeko. Estatuaren abokatuak ere zigorra eskatu zuen presoarentzat.

Presoaren abokatuak funtzionarioak zigortzea galdegin zuen, erasotzea eta lesioak eragitea leporatuta. Iragiren zauriak nabarmenak zirela gogorarazi zuen.

Martinezek utzi egin du gose greba

Idoia Martinez presoak urtarrilaren 10ean utzi zuen hilaren 6an hasitako gose greba, osasun arrazoiengatik, baina oraindik zigor ziegan jarraitzen du Joux la Ville kartzelan. Jakina denez, preso horrek ika-mika bat izan zuen funtzionario batekin, telefonoz deitzen utzi ez ziolako, eta funtzionarioak hozka egin zion presoari.

Ondoren presoak zigortu egin zuten: 45 egunez zigor ziegan sartu zuten. Gertatutakoa salatzeke hasi zuen gose greba Martinezek, eta 45 eguneko greba egiteko asmoa zuen.